

Ndwen 6, gou caeuq ndaw mbanj geij bouxdohi bae daengz Guengi-doeng Fuzsan ranz laeujdiemq ndeu guh hongdajcang. Dou cei maenh bae ciengz, lauxbanj couh anbaiz dou hwnjbae caengz daihsam, vix naeuz faq ciengz lawz bae hau, faq ciengz lawz nem cienmeng, youh heuh dou daeh niswjaenj hwnj caengz daihsam bae.

Gij niswjaenj bae ciengz gaenq doi youq baihrog bakdou hung. Gou caeuq Daegsam ram hwnjbae hawj gyoengqde bae ciengz, 50 bau niswjaenj aeu haet ndeu cij ram caez.

Gyanghaet 8 diemj buenq cung, geijcib boux vunzgoeng youq ndaw laeujdiemq hung nyaengqnyatnyat, miz loh dwk gag boux guh gag hong. Song boux canghfaex ram aen gunghyazgih ndeu hwnj daengz caengz daihngieh mbaeklae, aen daeh suliu ndaem ndeu coq youq gwnz gunghyazgih vaih lo, ndaw daeh lozswdinhg doek roengzdaej, miz haj roek gaen baedauq, loenq youq gwnz geij mbaeklae, boux riengzlaeng yungh din baet gvaq mbiengj ciengz, naeuz ram gihgi hwnj caengz daihseiq bae gonq caiq roengzdaej gip.

Gou caeuq Daegsam ram ndaej baez daihhaj, roengz daengz mbaeklae caengz daihngieh, raen goengbaetranz 60 lai bi cingq yaengx gaiq sauqbaet baet gij lozswdinhg haeuj daeh cang nyapnyaj bae. Gou sikhaek doiq de naeuz: “Gaej baet, gij lozswdinhg lij aeu!” Hoeng, de lumj mbouj ndaejnyi gou gangj maz, laebdaeb guh.

Mbwn ndwenloeg, bienqvaq vaiq, gyanghaet fwj hau daengngoengz angj, oem’ aeng dangqmaz. Cij ndaejnyi byajraez “hung hung” geij sing, yaek doek fwn lo, gou caeuq Daegsam gipmuengz buet ok bakdou hung bae daeh geijcib bau niswjaenj haeujdaej, ngamq daeh liux, fwn couh doek lo, haenq lai.

Song boux canghfaex gak boux dawz aen daehsuluu hau roengz mbaeklae caengz daihngieh gip lozswdinhg, mbouj raen saek naed, miz di geizheih, cam gou raen byawz gip bae, gou vix goengbaetranz. Song boux canghfaex gvaqbae cam goengbaetranz. De mbouj naihanfanz, vix dou

Baet Ranz



□ Moz Lijginz / 磨礼勤

hung baihrog doi nyapnyaj, naeuz: “Boekbak youq gizde.”

Song boux canghfaex baez dingq, bak ajloengqloengq. Boux canghfaex sang hozhwnj faegfaeg rongx naeuz: “Dairaq mwngz! Mbouj rox yawj gij lozswdinhg moqsak dwg ngamq cawx ma?”

Goengbaetranz hix mbouj han, laenggoz moegdoeg ndwn youq gokciengz, gaemz ien dawz gyangfwngz, ndoet hix mbouj dwg, vit hix mbouj dwg, song ndokgemj doed ok yaek coeg vunz, gij byoemgyaeuj nyumx gvaq, ndaw hau miz hoengz, ndaw ndaem youh cab miz lamz, mbouj sam mbouj seiq dwgcaengz yaekdai.

Boux canghfaex biz naeuz: “Baenzlawz guh ne, cib lai boux vunz deq cang diudingj hwnj dienmienh bae cang denhvahbanj, mbouj miz lozswdinhg, ngoenzneix mbouj ndaej guh hong lo.” Boux canghfaex sang naeuz: “Hong gaenj cixbah, youh deng goeng bag neix gauj vaihsaeh. Gou yawj naj mwngz dwg bouxlaux, mboujnex, gou caen siengj dik geij din hawj mwngz!” Goengbaetranz dingq le vuengmuengz deuzbae……

Gou caeuq boux canghfaex biz gangj dauqcungz bae cawx lozswdinhg dauqma couh ndaej lo. De naeuz: “Mwngz mbouj rox, gij lozswdinhg gig daegbied, bae Gvangicouh dindh aeu cij ndaej. Haxbaenh gou dwk denva hawj lauxbanj gai gij lozswdinhg neix, de naeuz gvaq song ngoenz cij ndaej.” Lingh boux canghfaex geq naeuz: “Deq song ngoenz, gou baema suenq lo.” Lingh boux canghfaex oi naeuz: “Baema caiq daej sai bae geij bak maenz, mwngz sij ndaej?”

Doeklaeng gyoengq canghfaex

mbwq dwk byaij hwnj byaij roengz, gou gyoh gyoengqde deq youq ndwi, hozndat goengbaetranz euqgeuz laekgaek.

Ngoenz daihngieh, cib lai boux canghfaex youq gungx ndaw daihding laeujdiemq dwkbaiz, cauz hemq gyukaca. Boux baujan venj lingjdai laeujdiemq byaij gvaqdaej cam: “Sou mbouj guh hong, youq gizneix hemq maz?”

Caezgya yawj de da ndeu, mbouj swt de. Gvaq le cib faen cung, de youh gvaqdaej, yakriri dwk naeuz: “Sou caiq nauh roengzbae, gou couh gyaep sou ok bakdou!” Seizneix miz boux ndeu dap naeuz: “Song ngoenz neix guh mbouj ndaej hong.” Boux baujan neix di he hix mbouj saenq couh deuz lo.

Dwkbaiz dwg cungj guh’ angq boux youq rog dajgoeng cei ngah, mbouj yinx geijlai, dwk maenz ngaenz he, byawz hingz couh ndaej boux saw haenx maenz ngaenz he. Seizneix, gyoengq canghfaex ra ndaej 4 aen doengjyouzcaet daej, gwnz vang gep benj, gak boux gak ra ndaek suijnizcenh, naengh humx gvaqdaej. Mizmbangj mbouj miz dieg naengh, ndwn humx youq boux ndaej naengh baihlaeng, baiz baij cungqyang benj hung, gak boux gak baij ngaenz youq seiqhenz.

Sawhingz mbouj youqgaenj, caezgya couh maij nauhyied. Cingq dwk daengz seiz haenq, boux baujan venj lingjdai daiq lingh boux baujan haeuj bakdou daej. Boux baujan neix hoz raez, sangrwd, byoemgyaeuj roi coh baihlaeng, daj mozswh wenjyapyap, fwngzgvaz dawz diuz faexgyaengh ndeu. Baihlaeng riengz boux

goengbaetranz, dawz gaiq baetgaenzraez, doq byaij doq damzbyoedbyoed: “Bang goet cienh neix okbae!” Gou caeuq Daegsam youq daihding doq daengq sang, ndaej raen gij saehcingz daj goek daengz rieng.

Bouxbwngienj canghfaex fwd roxnynh baihlaeng de miz diuz faexgyaengh hung lumj gaenzcax nei dingj dwk baihlaeng. Henz ndang song canghfaex ngeuxgyaeuj yawjraen dwg boux baujan hozraez fwngzgvaz gaem diuz faexgyaengh.

“Mwngz?” Song canghfaex doeksaet dwk cam.

“Gaej ning!” Baujan hozraez yakdoeg dwk naeuz.

“In yo!” Bouxbwngienj canghfaex swenj naeuz. Baihlaeng deng faex nyoeg gizhaenx gij lwed gaenq conh ok buhhau. Gyoengq canghfaex ndwn dwkbaiz haenx humx gvaqdaej, gienq naeuz: “Baujan sienseng, lajfwngz louzcingz lo.”

Baujan hozraez yawjsiuj dwk naeuz: “Haxbaenh de mbouj dwg angq hemq yaek dai ma? Seizneix youh swenj in lo? Cangmoengx.”

Hangz vunz baenzlai! Boux canghfaex sang byaij gyawj, fwngzgvaz gaem dawz gyang faexgyaengh doi coh baujan hozraez, song boux canghfaex doq rex bouxbwngienj gvaq henz bae, boux baujan venj lingjdai song fwngz doq fan boek gep benj, gep benj neix cingqngamj daengj youq gwnz gyauejhoq geij boux canghfaex naengh. Gij baiz caeuq ngaenz loenq youq gwnz gyauej gwnz mbaq, doek roengz gwnznamh, vava loegloeg. Song boux canghfaex ndwn haenx doq rax dawz benj hung, coh boux baujan venj lingjdai nyoengx bae, lumj raq rumzhwx fwd daej, de laemx roengz laj benj. Gep benj hung dimz dwk, de haenqrengz yaek dingj fan benj hung, haj roek boux canghfaex hixnaengz yungh fwngz gaemh dwk, de lumj duz mou hung yaek deng gaj buekmingh cak swenj: “Gou ndaej hwnjdaej ni, aeu dai sou!” Gyoengq canghfaex dingq le, engqgya hozndat, aeu din caij daenz benj hung, laj benj cienz daej gij sing swenjyauyau.

(caengz sat)

Vahcuengh Raeuz Caemh Gyaeu

咱们壮话也美

□ Vangz Civeij / 黄志伟

Vahcuengh dwg vah raeuz,
Lwg Bouxcuengh lajmbanj,
Bouxbox cungj rox gangj,
Gangj vah raeuz sim’ angq.

Ciuhgonq yo hwnjdaej,
Caendwg mbouj yungzheih,
Beixnuengx youq itheij,
Caez insik vah raeuz.

Geij naeuz vah raeuz yoq,
Vah raeuz goj caemh gyaeu,
Raeuz caez gyoeb caemh youq,
Gangj vah raeuz mbouj dingz.

Vahcuengh raeuz eu fwen,
Dwen soemj van haemz manh,

Lumj raemx lae raemx langh,
Miz angq youh miz you.

Vah raeuz goj caemh gyaeu,
Eu fwen daej haenh angq,
Gaej vut de gvaq vang,
Dangq gorum go’ nywj.

Vahcuengh dwg vah raeuz,
Dingqnaeuz vunz guekrog,
Dawz Sawcuengh raeuz doeg,
OK bak raeuzledled.

Vah raeuz goj caemh gyaeu,
Lwgcuengh aeu geiq ndei,
Hawj de lumj raemx lae,
Cienz ndaej ciuh dem ciuh.



Gyoengq dahsau biujyienj hawj vunz maez.

Dozswh